

## 開放文學 – 歷代筆記 – 夷堅丙志 第十三卷

藍姐 紹興十二年·京東人王知軍者·寓居臨江新淦之青泥寺·寺去城邑遠·地迴多盜·而王以多貲聞·嘗與客飲·中夕乃散·夫婦皆醉眠·俄有盜入幾三十輩·悉取諸子及群婢縛之·婢呼曰·主張家事·獨藍姐一人·我輩何預也·藍蓋王所嬖·即從眾中出·應曰·主家凡物皆在我手·諸君欲之·非敢惜·但主公主母方熟睡·願勿相驚恐·秉席問大燭·引盜入西偏一室·指床上篋笥曰·此為酒器·此為綵帛·此為衣裳·付以鑰·使稱意自取·盜折被為大復·取器皿蹴踏置於中·燭盡又繼之·大喜過望·凡留十刻許乃去·去良久·王老亦醒·藍始告其故·且悉解眾縛·明旦訴於縣·縣達於郡·王老戚戚成疾·藍姐密白曰·官何用憂·盜不難捕也·王怒罵曰·汝婦人何知·既盡以家貲與賊·乃言易捕何邪·對曰·三十盜皆著白布袍·妾秉燭時·盡以涎淚污其背·但以是驗之·其必敗·王用其言·以告逐捕者·不兩日·得七人於牛肆中·輒轉求跡·不逸一人·所劫物皆在·初無所失·漢張敞傳所記·偷長以赭污群偷裾而執之·此事與之暗合·婢妾忠於主人·正已不易得·至於遇難不懼怯·倉卒有奇智·雖編之列女傳不愧也·

長溪民

福州長溪民·為贅婿於海上人家·以漁為業·其母思而往見之·民殊不樂·母覺其意·明日即告歸·民不肯留·而其婦獨留之曰·阿姑少留·候得魚作杯羹·少頃民還·至門聞母語聲·急藏魚於舍後·復誑其母·且告之曰·今日風惡·不獲一鱗·母遂去·既行·民責妻曰·吾適所得皆鱖魚·既多且大·常日不曾有此·汝何苦留此間耶·婦往視·則滿籃皆蛇也·驚走報民·民不信·自往焉·果見群蛇蟠結·一最大者昂首出·徑咋其喉即死·蛇亦不見·

福州異豬

政和元年正月·福州北門賣豆乳人家·豬夜生七子·但一為豬·餘皆人頭馬足·肌體悉類人·淨無一毛·初生時·呱呱作兒啼·其家懼·亟瘞於廁後·鄰人聞啼聲·伺曉入視·猶及見其二·取以示裡中·斯須間·觀者如市·郡守知為不祥·命亟殺之·時方上祥瑞·不敢以聞於朝·

福州屠家兒

福州城中羊屠家兒·年十六歲·性柔善·惟嬉游市井間·不肯學父業·父母謂之曰·汝已成長·當學世業為活·為養親之計·浪遊何益·對曰·逐日眼見已熟·要殺便能·何以學為·父以羊一刀一付之·閉諸空屋·竊窺其所為·自旦至午·但對羊默坐·忽握刀而起·指羊曰·與汝相為仇·豈復有窮極·揮刀自斷其喉·父母急發壁救之·無及矣·

林翁要

福州南台寺·塑新佛像·而毀其舊·水上林翁要者·求得觀音·歸事之·後數月·操舟入海·舟壞而溺·急呼觀音曰·我嘗救汝·汝寧不救我·語訖·身便自浮·得一板乘之·驚濤互天·約行百餘里·隨流入小浦中·獲遺物一笥·頗有所資而歸·人以為佛助·右四事皆福州太平寺僧蔣寶所傳·寶有一書·曰冥司報應·記此事·

郭端友

饒州民郭端友·精意事佛·紹興乙亥之冬·募眾紙筆緣·自出力以清旦淨唸書·華嚴經·期滿六部乃止·癸未之夏五·染時疾·忽兩目失光·翳膜障蔽·鑿屢救療皆無功·自念惟佛力可救·次年四月晦·誓心一日三時·禮拜觀音·願於夢中賜藥或方書·五月六日·夢皂衣人告曰·汝要眼明·用獼掌散熊膽圓則可·明日遣詣市訪二藥·但得獼掌散·點之不效·二十七夜·夢赴薦福寺飯·飯罷歸·及天慶觀前·聞其中佛事鐘磬聲·入觀之·及門·見婦女三十餘人·中一人長八尺·著皂春羅衣·兩耳垂肩·青頭綠鬢·戴木香花·冠如五斗器大·郭心知其異·欲候回面瞻禮·俄紫衣道士·執笏前揖曰·我乃都正也·專為華嚴來迎·請歸舍啜茶·郭隨以入·過西廊·兩殿垂長黃幡·一女跪爐禮觀音·簾外青布幙下·十六僧對鋪坐具而坐·道士下階取茶器·未及上·郭不告而退·徑趨法堂·似有所感·遇夜分乃覺·明日告其妻黃氏雲·熊膽圓方·乃出道藏·可急往覓·語未了·而甥朱彥明至·曰·昨夜於觀中偶獲觀音治眼熊膽圓方·舉室驚異·與夢吻合·即依方市藥·旬日乃成·服之二十餘日·藥盡眼明·至是年十月·平服如初·即日便書前藥方靈應特異·增為十部乃止·今眸子了然·外人病目疾者·服其藥·多愈·藥用十七品·而熊膽一分為主·黃連密蒙花·活皆一兩半·防已二兩半·草龍膽蛇蛻地骨皮大木賊仙靈脂皆一兩·瞿麥旋覆花甘菊花皆半兩·蕤仁一錢半·麒麟竭一錢·蔓青子一合·同為細末·以羯羊肝一具·煮其半焙乾·雜於藥中·取其半生者·去膜乳爛·入上藥·杵而圓之·如桐子大·飯後用米飲下三十粒·諸藥修治無別法·唯木賊去節·蕤仁用肉·蔓菁水淘·蛇蛻炙去·郭生自記其本末·但所謂法堂感遇·不以語人·

洪州通判

鄉人李賓王利用紹興二年·知新淦縣·以宣撫使入境·躬至村墟督賦·其僕夢主人歸·劍槌傳呼曰·洪州通判來·且以告主母·李公至·妻言其事·李笑曰·孤寒如是·方大軍絡繹過縣·幸不以乏興為罪·得供給糧餉足矣·別乘非所望也·明年八月滿秩·果為洪州倅·卒如僕夢·

金君卿婦

荊南某太守之女·年十有八歲·既得婿·將擇日成禮·夢人告曰·此非汝夫·汝之夫乃金君卿也·既覺不以語人·但於繡帶至·每寸輒繡金君卿三字·母見而疑之·以告其父·父物色府中·至於胥史小吏·無有此人·詰其女·具以夢白·未幾所議之婿果死·後半歲·新峽州守入境·遣信至府·則金君卿也·始悟前事·至別厚待之·留連累日·知其新失伉儷·以女夢告之·金曰·君卿犬馬之齒·四十有二矣·比於賢女·年長以倍·又加其六焉·且悼亡未久·義不忍也·主人強之·且曰·因緣定數·君安能辭·不得已竟成昏·後三十年·金乃卒·妻生數子·金官至度支郎中·番陽人也·右二事皆李賓王說

鐵冠道士

鄭介夫俠·福州福清人·熙寧中·以直諫貶英州·元祐初·東坡公薦之復官·紹聖初·再謫英·時坡公貶惠州始與相遇·一見如故交·政和戊戌·介夫在福清·夢客至·自通鐵冠道士·遺詩一章·視之·乃坡公也·坡在海上·嘗自稱鐵冠道人·時下世十七年矣·其詩曰·人間真實人·取次不離真·官為憂君失·家因好禮貧·門闌多杞菊·亭檻盡松筠·我友朽疏者·相從恨不頻·又曰·介夫不久須當來·寤而歎曰·吾將逝矣·時年七十八·明年秋被疾·語其孫嘉正曰·人之一身·四大合或·四者若散·此身何有·口占一詩曰·似此平生只藉天·還如過鳥在雲邊·如今身畔渾無物·贏得虛堂一枕眠·數日而卒·

張鬼子

洪州州學正張某·天性刻薄·老而益甚·雖生徒告假·亦靳固不與·學官給五日則改為三日·給三日則改為二日·它皆稱是·眾憾之·有張鬼子者·以形容似鬼得名·眾使為作陰府追吏·以怖張老·鬼子欣然曰·願奉命·然弄假須似真·要得一冥司牒乃可·眾曰·牒式當如何·曰·曾見人為之·乃索紙以白礬細書·而自押字於後·是夜詣州學·學門已扃·鬼子入於隙間·眾駭愕·張老見之·怒曰·畜產何敢然·必諸人使爾夜怖我·笑曰·奉閻王牒追君·張老索牒·讀未竟·鬼子露其巾·有兩角橫其首·張老驚號即死·鬼子出立於庭·言曰·吾真牛頭獄卒·昨奉命追此老·偶渡水失符·至今二十年·懼不敢歸·賴諸秀才力·得以反命·今弄假似真矣·拜謝而逝·陳正敏遁齋閒覽·記李安世在太學·為同捨生戲以鬼符致死·與此頗同·然各一事也·

太平宰相

宣和中、艮岳之觀游、極其偉麗、既有絳霄樓華胥殿諸離宮矣、其東偏接景龍門、巨竹千個、蔽虧翠密、京師他苑園亦罕比、宮嬪出入其間、如仙宸帝所、徽宗命建樓以臨之、既成而未有名、夢金紫人言曰、艮岳新樓、宜名為倚翠、取唐杜甫詩所謂天寒翠袖薄日暮倚修竹之句也、夢中問汝何人、對曰、臣乃太平宰相、寤而異之、明旦、翰林學士李邦彥入對、奏事畢、偶問曰、近於苑中立小樓、下有修竹、當以何為名、邦彥了不經思、即以倚翠對、上驚喜、謂與夢協、時邦彥眷注已深、有意大用、自是數日間拜尚書右丞、遂為次相、

路當可得法

政和中路君寶確知陳州商水縣、其子當可時中侍行、方十七歲、未授室、讀書於縣圃四照堂、時梁仲禮為主簿、二子俊彥、敏彥、皆十餘歲、相與游處、一夕、圃吏告失時中所在、君寶遣卒遍索於邑中、不可得、閱五日乃出、謂其逸游、杖之、時中不敢自直、但常常吐鮮血、而私語梁主簿曰、問者獨坐小室、有道人不知何許、來與某言、久之曰、汝可教、吾付汝以符術、可制天下鬼神、然汝五藏間穢污充積、非悉掃去不可、初甚懼其說、笑曰、無傷也、命取生油白蜜生薑各一斤、合食之、遂與俱去、亦不知何地、凡數日不思食、唯覺血液津津自口出、每夕以文書十餘策、使誦讀、晝則無所見、臨別又言曰、汝已位為真官、階品絕高、但如吾術行之足矣、自是遂以法篆著、後數月、謂梁子曰、吾此書一符錯誤、獲譴不小、當削階數級、仍有癘疽之害、未幾疽發於背、如碗大、痛楚備極、凡四十九日乃痊、右二事皆梁俊彥子正說

長樂海寇

紹興八年、丹陽蘇文瓘、為福州長樂令、獲海寇二十六人、先是廣州估客及部官綱者、凡二十有八人、共僦一舟、舟中篙工柁師、人數略相敵、然皆勁悍不逞、見諸客所贖物厚、陰作意圖之、行七八日、相與飲酒大醉、悉害客、反縛投海中、獨留兩僕使執爨、至長樂境上、雙檣折、盜魁使二人往南台市之、因泊浦中以待、時時登岸為盜、且掠居人婦女入船、無日不醉、兩僕逸其一、徑詣縣告焉、尉入村未返、文瓘發巡檢兵、自將以往、行九十里、與盜遇、會其醉、盡縛之、還至半道、逢小舟雙檣橫前、叱問之不敢對、又執以行、無一人漏網者、時張子戩給事致遠為帥、命取舟檢索、覺舵尾百物縈繞、或入水視之、所殺群屍、並萃其下、僵而不腐、亦不為魚鯢所傷、張公歎異、亟為斂葬、盜所得物才三日、元未之用也、張庭實德輝說

蔡州禳災

呂安老尚書、少時入蔡州學、同捨生七八人、黃昏潛出遊、中夕乃還、忽驟雨傾注、而無雨具、是時學制崇嚴、又未嘗謁告、不敢外宿、旋於酒家假單布衾、以竹揭其四角、負之而趨、將及學牆、東望巡邏者、持火炬傳呼而來、大恐、相距二十餘步、未敢前、邏卒忽反走、不復回顧、於是得逾牆而入、終昔惴惴、以為必彰露、且獲譴屏斥矣、明日兵官申府雲、昨二更後大雨正作、出巡至某處、忽異物從北來、其上四平如席、模糊不可辯、其下謾謾如人行、約有腳三二十隻、漸近學牆乃不見、郡守以下、莫能測為何物、邦人口相傳、皆以為巨怪、講於官、每坊各建禳災道場三晝夜、繪其狀、祠而磔之、然則前史所謂席帽行籌之妖、也殆此類也、尚書之子虛己說

蟹治漆